



Broj: 02-04-1197/20
Datum, 05.01.2021. godine

ZAPISNIK

sa 2. redovne sjednice 7. saziva Općinskog vijeća Doboj Istok

Druga redovna sjednica 7. saziva Općinskog vijeća održana je dana 31.12.2020. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, te predstavnik RTV TK.

ODSUTNI: Izet Hodžić, zamjenik predsjedavajućeg Općinskog vijeća.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Kolege i kolegice vijećnici, načelnice sa saradnicima, predstavnici medija esalamu alejkum i dobar dan. Otvaram 2. redovnu sjednicu 7. saziva Općinskog vijeća Doboj Istok. Prije nego što počnemo zamolio bih kolegu Hasana Hasančevića da da svečanu izjavu.“

Hasan Hasančević: „Ja Hasan Hasančević, svečano izjavljujem da ću povjerenu dužnost obavljati savjesno i odgovorno, pridržavati se Ustava i zakona Bosne i Hercegovine, Federacije Bosne i Hercegovine, Tuzlanskog kantona, te Statuta općine Doboj Istok, zalagati se za ljudska prava i slobode, za ravnopravnost građana i da ću u svim prilikama štiti interese i boriti se za izgradnju i napredak Općine Doboj Istok“.

Selmin Karić, predsjedavajući Općinskog vijeća: „ Čestitam kolega Hasane i molim te da potpišeš izjavu. Prije nego što počnemo zamolio bih vas da se sjetimo i odamo počast učenjem Fatihe ili na neki drugi način nedavno preminulom našem sugrađaninu rahmetli Osmanu Junuzoviću, sigurno najvećem sportisti općine Doboj Istok i jednom od najboljih sportista Bosne i Hercegovine od sticanja njene nezavisnosti, momku koji je bio ambasador svoje općine i države Bosne i Hercegovine širom Evrope i svijeta, čovjeku koji je sa 27 godina postao legenda bosanskohercegovačke atletike i sporta uopšte. Hvala ti Osmane za sve što si uradio za svoju općinu i domovinu. Elfatiha. Neka mu je vječni rahmet i lahka zemlja bosanska i da mu dragi Alah podari lijepi dženet. Zamolio bih tehničnog sekretara da nam utvrdi kvorum na današnjoj sjednici. Prisutno je 16 vijećnika, a odsutan je Izet Hodžić, što znači da imamo kvorum.“

VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ima li neko vijećničkih pitanja i inicijativa?“

Kemal Skopljak, vijećnik BPS – Sefer Halilović: „ Prije svega želim da pozdravim i poselamim sve prisutne. Ja imam jedno pitanje koje se odnosi na kamp Duje. Znae da je u posljednje vrijeme migrantska kriza u epicentru. Da li vi, načelnice, imate kakve podatke da li je stiglo gore migranata i o kakvim se migrantima radi? Ako možete da nam objasnite, jer nas stalno pitaju ljudi. Ima svakakvih priča i voljeli bi da znamo tačno kakvo je stanje gore u kampu.“

Selmin Karić, predsjedavajući Općinskog vijeća: „ Kolega, ako možeš pismeno da dostaviš pitanje. Ima li još pitanja? Nema. Znači, odgovor na pitanje bit će dostavljen pismeno.“

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju sjednicu je predviđen sljedeći dnevni red:

- 1. Razmatranje i usvajanje prijedloga Budžeta općine Doboj Istok za 2021. godinu,*
- 2. Razmatranje i usvajanje prijedloga Odluke o izvršenju Budžeta općine Doboj Istok za 2021. godinu.*

Otvaram raspravu po dnevnom redu i ako ima neko da doda izmjenu neku. Nema. Ko je za ovakav dnevni red?

Glasanje: ZA – 16, PROTIV – 0, UZDRŽANIH – 0.

Znači dnevni red je jednoglasno usvojen.“

REALIZACIJA DNEVNOG REDA

Ad. 1. Razmatranje i usvajanje prijedloga Budžeta općine Doboj Istok za 2021. godinu.

Selmin Karić, predsjedavajući Općinskog vijeća: „Obzirom da je bilo amandmana zamolio bih predlagača Budžeta da se izjasni po amandmanima.“

Kemal Bratić, općinski načelnik: „ Predsjedavajući, uvažene vijećnice i vijećnici selam alejkum i dobar dan. Nadam se da me predlagači amandmana neće krivo shvatiti, a krenut ću onako kako su pristizali amandmani. Prvi amandman je od vijećnika Kemala Skopljaka i vi ste dobili sadržaj amandmana da ne čitam. Prijedlog je da se u budžet uvrsti Unija veterana. Moje mišljenje je da je pored ovog prijedloga amandmana trebalo dostaviti program rada Unije veterana, ID broj, kopiju rješenja i da imamo dovoljno udruženja od posebnog značaja. Kako oni rade ja ne znam i neću ulaziti u to i to je stvar rukovodstva koji to rade, tako da ovaj amandman za mene nije prihvatljiv. Sljedeći amandman je prijedlog poštovane vijećnice Emire Karić da se podsticaji poljoprivredi od 17.000 poveća za još 15.000. Želim samo da Općinsko vijeće zna, a vjerovatno svi ne znaju pošto ima i novih vijećnika, da je u toku ove godine za podsticaje za proljetnu sjetvu na području općine Doboj Istok došlo oko 200.000 KM i svako ko je aplicirao i dobio je u iznosu do 1.000 KM. Prekjuče sam potpisao ugovor za još 70.000 KM, a radi se o jesenjoj sjetvi. Ono što me posebno zbunilo tako da ovaj amandman nije prihvatljiv iz tog razloga je da je ovdje napisan konto 614323 – kulturne i sportske manifestacije i to nije tačno, jer to nije taj konto, taj konto je transfer za parlamentarne političke partije, tako da je ovaj amandman donekle i nepravilno napisan. Sljedeći amandman je prijedlog da se Udruženju građana „Vrba“ dodijeli 300 KM na godišnjem nivou. Moje mišljenje je i nadam se da me neko neće krivo shvatiti, da je ovaj amandman malo i neozbiljan, jer tako malan iznos da se dodijeli tako dobrom udruženju. Sljedeći amandman je prijedlog da se poveća iznos za stipendije. Mislim da ovaj prijedlog nije u skladu sa pravilnikom o dodjeli stipendija koji je usvojilo Općinsko vijeće i samim tim ni ovaj amandman za mene nije prihvatljiv. Sljedeći prijedlog, odnosno amandman je takođe od uvažene općinske vijećnice Emire Karić da se sa konta 600000 tekuća budžetska rezerva skine određeni iznos i da se uvećaju transferi mjesnim zajednicama. Ovaj konto ja nisam mogao naći, jer ne postoji u budžetu općine Doboj Istok, tako da je i taj amandman nepravilan, jer budžetska rezerva je konto 610000. To je što se tiče amandmana. Svi priloženi amandmani, neki iz tehničkih razloga, a neki iz neke neopravdanosti za mene kao predlagača nisu opravdani i ja molim i predlagača i Općinsko vijeće da isto uvaže.“

Selmin Karić, predsjedavajući Općinskog vijeća: „ Zahvaljujem se načelniku. Predlagači amandmana da li želite da se izjašnjavate po amandmanima?“

Kemal Skopljak, vijećnik BPS – Sefer Halilović: „Naravno da želim da se izjasnimo o amandmanu, ali bih samo kratko replicirao, ako može, na odgovor načelnika. Ja ne vidim razliku u svim ovim dosadašnjim udruženjima i ne vidim razlog zašto Unija veterana ne može ući u budžet kao i sva druga udruženja koja su ušla do sada i za koja smo svi jednoglasno svaki puta glasali. Jednostavno ne vidim razlog. Ja sam prije toga vama dostavio rješenje i znate o čemu se radi, a ID broj se radi. Ako je samo to razlog načelnice, onda stvarno nemam šta više komentarisati. Želim da se izjasnimo o amandmanu.“

Selmin Karić, predsjedavajući Općinskog vijeća: „Kolegice Emira, želite li da se izjašnjavamo po amandmanima?“

Emira Karić, predsjednica kluba vijećnika SDP: „Prije svega pozdravila bih novog/starog gospodina načelnika i novog predsjedavajućeg, kolege vijećnike i medije. Dozvolit ćete mi da izrazim svoje zadovoljstvo kada su u pitanju kolegice vijećnice, odnosno povećanje broja vijećnica, a takođe zadovoljstvo je još veće kada je od pet klubova, u tri kluba su predsjednice žene što je rijedak primjer, možemo reći i na Tuzlanskom kantonu i Federaciji. Što se tiče amandmana, a kasnije ću nešto o budžetu, mogu reći ocjena dovoljan 2 za argumentovanje odbijanja amandmana. Ja bih se gospodine načelnice, odlučila u budućnosti samo odbiti amandmane, a ne ovako zaista jako jako, da kažem, smiješne stvari zbog kojih se amandmani odbijaju, odnosno malo više poraditi na tome kako da argumentujemo odbijanje amandmana. Budžet je servis građana i on bi tako trebao i da bude. Što se tiče amandmana vezanog za projekte u poljoprivredi, a vi ste govorili za sjetvu i ja sam tačno navela da to treba da bude dijelom konta projekti u poljoprivredi tipa da se neko odluči za sušare, ljekovito bilje i da ne nabrajam, jer ima raznih kapaciteta i smatram da bi to trebalo da bude praksa u našoj općini i da zaista razvijamo te oblike poljoprivredne proizvodnje. Vidjeli smo, da ne govorim sada o koroni, šta znači biti zatvoren. U Hrvatskoj smo vidjeli kada se općine zatvaraju i kada se gradovi zatvaraju kako tada shvatimo da smo mogli više uraditi u našoj prošlosti. Tako i kroz ovaj budžet koji bi šest mjeseci trebao više ići u neke projektne stvari zato što skidanje sa reprezentacija, sa kulturnih i javnih događanja je išlo zbog toga što se to još uvijek neće dešavati u narednih šest mjeseci. Mislim da je logično da se skine sa tih konta. Što se tiče tih konta i to je smiješno i evo ja sam našla 600000 tekuća rezerva na trećoj stranici. Prvo morate preoblikovati, ja ne znam je li ekonomski kod jedne godine, a druge godine konto, ali mislim da se mi svi tu razumijemo. Takođe ja mogu reći da vam vraćam materijale zato što su neuredni, zato što se pojedina konta i ne vide, jer izgleda nemate dovoljno novaca za kopije, da ga osposobite kako treba. Znači svako može takve stvari da nađe, a ja ću nastaviti na nekoj realnoj osnovi. Dakle niste trebali to konto je li ovo ili ono, a na kraju krajeva ja kažem i ne vidi se i sada da pričam ovdje da budžet treba da bude jasan i transparentan, slikovit i narativan itd. Dva nova vijećnika u mom klubu kažu šta je ovo, pa šta je ono. Ljudi treba tumač, iskreno treba tumač za ovaj oblik obrasca ili načina na koji ste se odlučili da predstavite budžet. Što se tiče 300 KM mislila sam za završni račun, jer ljudi daju od sebe kada su u pitanju izviđači, ti članovi daju iz svoga džepa, pa makar da uvrstimo tih 300 KM da urade taj završni račun. Ono što mi je najviše žao je amandman kada su u pitanju stipendije, jer sam mislila da to zaista bude motivacija našim studentima. On se mogao skinuti, a na kraju krajeva on se možda neće ni potrošiti, ali samo kao motivacija, pa je bolje da student dogura do 9,8 i da zna da će iduće godine primiti stipendiju 200 KM mjesečno kako sam ja to zamislila, a to se sve može uraditi novim pravilnikom ili nekim novim prijedlogom. Zaista treba ulagati u pamet, ako neko nije svjestan ove situacije pamet i znanje će nas itekako spasiti u ovoj državi. Mislim da to neće biti ni stranke ni vijeća, nego samo pamet, ali eto vidim da niste raspoloženi ni za poljoprivredu, ni za pamet, ni za neki iznos koji bi spasio neku nevladinu organizaciju. Ne želim reći hvala.“

Selmin Karić, predsjedavajući Općinskog vijeća: „Zahvaljujem. Prvi amandman kolege Kemala Skopljaka koji glasi: Obzirom da na općini Doboj Istok imamo registrovano Udruženje JOB „Unija veterana“ Doboj Istok, a isto se ne nalazi na spisku udruženja koje sufinansira Općina iz svog budžeta, molim vas da isto ubacite u budžet kako bi bili ravnopravno zastupljeni kao i ostala udruženja. Predlažem da sredstva skinete sa konta 613991 ostale nespomenute usluge i dadžbine u iznosu od 4.000 KM, kao i drugim udruženjima te kategorije. Broj Rješenja ovog udruženja je: UPI-06/1-04036473/20 od 09.12.2020.godine. Ko je za ovaj amandman?

Glasanje: ZA – 6, PROTIV – 0, SUZDRŽANIH – 10.

Amandman nije dobio potrebnu većinu.

Sljedeći amandman je kolegice Emire Karić: Predlažem da se broj konta 614517 – podsticaj za projekte u poljoprivredi poveća za 17.000 KM, a isti iznos skinuti sa konta 613914 – usluge reprezentacije 5.000 KM,

613991 – ostale nepomenute usluge i dadžbine 5.000 KM i 614323 – kulturne i sportske manifestacije 5.000 KM.

Obrazloženje: Smatram da svi nivoi vlasti pa tako i naša lokalna zajednica moraju što više ulagati u poljoprivredu i moraju se u budžetima pronaći sve moguće uštede i racionalnosti i usmjeriti prema ovoj grani privrede. Navedena konta se itekako mogu smanjiti prije svega što iduće godine se moraju poštovati mjere protiv pandemije COVID-a. Ko je za ovaj amandman?

Glasanje: ZA – 6, PROTIV – 0, SUZDRŽANIH – 10.

Amandman nije dobio potrebnu većinu.

Sljedeći amandman kolegice Emire Karić: Predlažem da se u broj konta 614300 – tekući transferi neprofitnim organizacijama uvrsti i nevladina organizacija Odred izviđača „Vrba“ sa planom od 300 KM, a isti iznos skinuti sa konta 613416 – izdaci za sitni inventar.

Obrazloženje: Ova nevladina organizacija u posljednje vrijeme pokazuje veliku organizovanost i spremnost na saradnju oko organizacije različitih obilježavanja i takmičenja. Sve više mladih je uključeno i pokazuje zainteresovanost za sve oblike djelovanja unutar nje. Ko je za ovaj amandman?

Glasanje: ZA – 6, PROTIV – 0, SUZDRŽANIH – 10.

Amandman nije dobio potrebnu većinu.

Sljedeći amandman: Predlažem da se broj konta 614234 isplata stipendija uveća za 2.400 KM s ciljem da se dodijeli mjesečno jedna stipendija u iznosu od 200 KM za studente sa prosjekom ocjena 10, a isti iznos skinuti sa konta 613111 – benzin 300 KM, 613512 – dizel 700 KM, 613412 – izdaci za kompjuterski materijal 400 KM, 613212 – izdaci za centralno grijanje 1.000 KM.

Obrazloženje: Smatram da se svi nivoi vlasti moraju okrenuti ka ulaganju u „pamet“, a ovo bi bio mali doprinos naše lokalne zajednice. Ko je za ovaj amandman?

Glasanje: ZA – 6, PROTIV – 0, SUZDRŽANIH – 10.

Amandman nije dobio potrebnu većinu.

Sljedeći amandman: Predlažem da se konta 614819-1, 614819-2, 614819-3, 614819-4, 614819-5 trebaju uvećati za po 2.000 KM, a isti iznos od 10.000 KM skinuti sa konta 600000 – tekuća budžetska rezerva.

Obrazloženje: Smatram da se ovim povećanjem a naravno i mnogim drugim radnjama mora jačati uloga mjesnih zajednica koja u posljednje vrijeme sve više slabi, a znamo da je to osnovna ćelija društva. Ko je za ovaj amandman?

Glasanje: ZA – 6, PROTIV – 0, SUZDRŽANIH – 10.

Amandman nije dobio potrebnu većinu.

Otvaram raspravu po prijedlogu Budžeta za 2021. godinu.“

Mehmed Mehinović, vijećnik SBiH: „Gospodine predsjedavajući, ja ću krenuti od onoga što se obično govori na kraju, jer obzirom na moje godine može se desiti da to zaboravim. Želim u svoje ime da čestitam nastupajuću Novu godinu vama i vašim porodicama, da vas prati zdravlje, dva puta i tri puta da vas prati zdravlje i puno sreće i uspjeha. Budite mi živi i zdravi, ako Bog da, i da se družimo i iduće, one tamo, godine zajedno. Pošto sam na strani čestitki iskoristit ću priliku da poželim novoj parlamentarnoj većini, imaju dobru prohodnost, da kreiraju dobro naš parlamentarni život i život građana Doboj Istoka i to želim od srca. Naravno nemojte zamjeriti opozicija to gleda nekada drugačijim očima, ali što se mene lično tiče svaka moja diskusija neće biti podbadanje, nego će biti u smislu da poboljšamo neke stvari na našoj općini kako bi bilo još bolje. Naravno ne moram biti uvijek u pravu. Smatram da kada je budžet u pitanju i posve mi je jasno da će on biti usvojen u ovakvom obliku. Međutim kao čovjek koji se bavi ovom materijom od '80 - tih godina, kada neki od vas niste bili ni rođeni i smatram da sam kredibilitivan po ovom pitanju i da bi mogao dosta stvari da kažem i prokomentarišem, da ako ništa ubuduće možemo neke stvari izmijeniti. Pojmova budžeta prema definiciji ima nekoliko, a prevedeno na bosanski jezik jeste da je to planirani plan prihoda i rashoda za određeni vremenski period, obično za jednu godinu. Plan prihoda predstavlja izvore iz kojih će se sredstava popuniti prihodi i rashodi u što će se utrošiti ti prihodi. To je otprilike jedna definicija budžeta koja je prihvatljiva za čitavu državu našu Bosnu i Hercegovinu. Ja uvijek krećem od toga šta je dobro kada je budžet u pitanju, jer ima dobrih stvari ovaj budžet zaista. Dobro je da ga donosimo 31.12. za iduću godinu da bi zadovoljili neku formu i da možemo reći međunarodnim institucijama i to je stvarno dobro. Svima onima koji su se potrudili da to urade za ovaj period od mene hvala i čestitke. Nije loša ni struktura prihoda u ovom budžetu. Po nekim evropskim i svjetskim standardima međunarodnog monetarnog fonda nije loša struktura ovog budžeta. Moram priznati da nije loša, pa nije ni struktura rashoda loša. Ja ne gledam analitička konta, ja gledam strukturu prihoda i rashoda kako se oni ponašaju i ako se ponašaju dobro to je na neki način zadovoljavajuće, a ove finese unutra po kodovima i po kontima daju se uvijek dotjerivati. U ovom budžetu kvaliteta ima,

međutim kvantiteta nema i to je nešto što ja govorim i prošle četiri godine, a vjerovatno ću i ove četiri godine. Nas ovdje ima 16 prisutnih i ja bih vas pitao da kažete koliki je budžet bio planiran, koliko je ostvaren za devet mjeseci u prošloj godini, a da ne pričam sada o pojedinačnim kontima jesu li veća ili manja i prihodi osim poreza u odnosu na prošlu godinu, niko ne bi znao odgovoriti. Možda čast izuzecima, možda predsjedavajući i ko je još bio u komisiji, jer to ne možemo vidjeti iz ovog budžeta. To je ono što ja kao čovjek ne mogu prihvatiti i ja ću uvijek o tome diskutovati i uzmite kakve hoćete pokazatelje, ali sam u pravu kada ovo pričam. Nisam htio da ulazim, ali imao sam naše budžete od 2004, 2006. itd. pa i 2013. godine je bio drugačiji. Imali smo reviziju budžeta 2017. godine i gledajte kako je to, planiran budžet, ostvaren u tekućoj godini, ostvaren u prethodnoj godini i jednostavno vijećnici mogu vidjeti, a mogu i građani vidjeti šta je raslo, šta je opadalo, gdje se može intervenisati, gdje jednostavno ne možemo intervenisati. On zadovoljava formu kao takav, međutim ima dosta nejasnih stvari, jer kada ja kao čovjek koji se razumije ne mogu razjasniti neke stvari, ne znam kako će ostali koji ne razumiju. Naš budžet je 3.670.815 KM što je jako dobro i vjerovatno će doći do pada određenih prihoda. Ja ovdje imam podatke, a moj prijatelj Refik Šuvalić sjeća se kakvi su budžeti bili '98 i '96. godine i oni su se kretali, a nekada ću vam napraviti dijagram od 360.000, pa su evo došli do 3.600.000. Jako interesantan dijagram kako je općina rasla. Općina znači nije počela ni 2020, ni 2010, ni 2000. godine, nego teče od kada je priznata 10.03.1998. godine kada smo imali budžet koji je bio 360.000. Znači 10 puta na neki način otišlo je to u ovu tačku. Kada to gledam to je dobro. Realan budžet kada se oduzmu kapitalni primici koji su planirani od 1.350.000, je realan 2.320.000. Sa 2.320.000 treba biti umjetnik, pa zadovoljiti sve potrebe. Nikada se neće ni meni svidjeti, a neće ni drugima kada bih ja podijelio, ali eto treba oslušnuti drugačija mišljenja. Obični ljudi koji drugačije misle obično budu u pravu, ne budu u pravu oni koji tapšu po ramenu. To sam doživio i znam iz iskustva. Međutim ako govorimo o strukturi o kojoj sam govorio ona je dobra. Znači porez na imovinu je 219.000 učestvuje u budžetu sa 10%, porez na dohodak 513.000 i to je jako dobro, jer učestvuje 22% i to daje podatak da privreda ipak dobro radi na općini Doboj Istok, da imamo dobrih privrednih subjekata sa dobrim ostatkom dohotka i trebamo povesti računa, jer dobro pune budžet po tom osnovu, odnosno 20% oni finansiraju naše potrebe. Indirektni porezi 1.098.000 ili 47% i ne mogu sada pričati, ali vjerovatno će biti još u padu, ali Federalna vlada je dala smjernice, jer to se planira po smjernicama i da kantonalno ministarstvo daje saglasnost na to i to je što je dobro. Neporeski prihodi, to je ono što općina, takse i slično, 490.000 ili 21%. Znači struktura zadovoljava procenete. Htio sam samo jednu stvar u prihodima da prokomentarišem i uvijek sam diskutovao o tome, ima prihod 26.000 i nešto od igara na sreću. Obično kažemo da su prihodi i veći, ali ja sam razočaran što su prihodi ovakvi i nisam ni malo srećan i volio bih da su manji. Ovo nam treba biti putokaz kada budemo raspravljali o socijalnoj pomoći i jednokratnim pomoćima koje čitam u našem službenom glasniku. Govorim za Brijesnicu iz koje ja dolazim i vidio sam par ljudi koji su dobili jednokratne pomoći ovdje koji vrlo često izlaze iz sportskih kladionica. Ako je porez plaćen 26.000, koliko su naši građani potrošili para u kladionicama koje su otišle negdje drugo. Ovdje primaju jednokratne pomoći i socijalne pomoći i ubuduće zaista treba povesti računa da ovi prihodi budu manji, a da se ovo nadomjesti od negdje drugo. Nisam mogao preći preko ovih stvari i morao sam ih na neki način prokomentarisati. Rashodi po ravnoteži budžeta, oni su isto 2.341.000, a troškovi radnika i svi njihovi troškovi doprinosi, topli obrok itd. 41% učestvuju u budžetu i to je manje od 50% i volio bih da je to manje, ali tako je kako jeste, jer ima kolektivni ugovor i valja sve to ispoštovati. Materijalne usluge 583.000 sa 25% učestvuju i transferi i tekući rashodi 758.000 ili 32% ili 1/3 prihoda. Transferi su jedan dobar pokazatelj što građani često konzumiraju ono što općina vraća otprilike, a od transfera živi Centar za socijalni rad, žive i sportski klubovi, žive boračka udruženja i to je dio koji se vraća građanima da mogu ostvarivati neke svoje potrebe. Dodatak još i električna struja, pa i nije tako loše, jer se 1/3 vrati u te novčane tokove što može biti jako dobro. Ono što će možda neke i iznenaditi, a možda neke i naljutiti, sljedeće što ću reći, nisam nikada gledao koliko se potroši ni goriva ni reprezentacije, jer nisam taj tip uopšte. Ja znam da su stručni ljudi koji rade na budžetima i predlagač kada predlaže radi se na bazi ostvarenja za devet mjeseci ili na bazi procjene za 12 mjeseci ili na bazi plana za prethodnu godinu, pa bi imali neke uporedne pokazatelje. Ja ovdje ne mogu diskutovati ni o čemu, jer nemam nikakvih uporednih pokazatelja i nadam se iskreno, bez obzira koliko sam ja sa svojim rahmetli kolegom Safetom radio na tome i nadam se da ću bar u ovom mandatu to da uradim. Na Kolegiju sam ja potegao jedno pitanje i molim Kolegij da na sljedećoj sjednici stavimo tačku dnevnog reda, po Ustavu Federacije, po Ustavu Kantona, a i u Statutu Općine u članu 11. stoji da Općinu čine Općinsko vijeće i Općinski načelnik. To su vlasti. Iz kojeg razloga to govorim. Općinsko vijeće u budžetu učestvuje sa 2%, a od troškova Općinskog vijeća veći su i transferi pojedincima, veći su i ostali troškovi, a da ne govorimo o Centru za socijalni rad i Dječijem obdaništu itd. Međutim, zaista se traži od ovog Vijeća da radi, a mislim da radi dobro i ako će se samo štediti na Općinskom vijeću, a neće se štediti na ostalom, ja

zaista apelujem da budemo dio i da zahvatimo dio budžeta u većem obliku od 2 %, jer mislim da je to zaslužilo ovo Vijeće. Neko će otići u javnost i ja ću prvi podržati ako dođe do toga, nikakav nije problem, ali isto tako podržat ću ako treba da spasi onih 80.000 koje su sada trenutno za Vijeće budžet općine Doboj Istok i spreman sam da stavimo na dnevni red, pa da se odrekemo i toga i za to ću glasati. Nemojte ljudi da se podcjenjujemo, predstavnička vlast, zakonodavna vlast, a svi ste bili na izborima i vidjeli ste. Kemo je sada rekao da pitaju građani, a pitaju i mene građani, jer smo već etiketirani kao predstavnici vlasti i pitaju mnoge stvari. Nemojte da budemo podcjenjivani da se predstavnička vlast tretira u budžetu i da bude zastupljena sa samo 2% budžeta. Stvarno je mizerija, jer drugi učestvuju sa puno više. Prema tome ovo je moje osobno mišljenje i neka ga osuđuje ko kako hoće i neka čuje ko god hoće u javnosti. Raspitao sam se malo, u federalnom Parlamentu povećana je stavka kada su ove stvari u pitanju, gledao sam kantonalni budžet povećana stavka kada su ove stvari u pitanju, samo sa općinom Doboj Istok nešto nije u redu. Nemojte da nas podcjenjuje neko. Ja odgovorno radim ovo i ja sam se za ovaj budžet pripremao 3 – 4 sata, svaku stavku pregledao, uporedio, jer građani me pitaju. Prema tome ja molim da se u narednom periodu ozbiljno pozabavimo ovim i da nađemo načina, ne da budemo ekstra najbolji, nego da budemo prosječni na Kantonu, jer makar to zaslužujemo da budemo. Smatram da će ovo Vijeće raditi dobro i u tom smislu je ova moja diskusija koja se tiče tog jednog dijela rashoda. Žao mi je i lično bih podržao ovaj budžet, ali ne mogu ga podržati iz razloga što nema uporednih pokazatelja i što nema narativnog dijela. Mislim da je u ovako teškoj situaciji trebalo da nam kažete da je došlo do ispunjenja tih prihoda, jer mi jednostavno ne možemo naći, jer nemamo svih podataka. U tom dijelu nemojte haturiti i nemojte zamjeriti, ali imao sam potrebu da izađem i da neke stvari otprilike podcrtam i da usmjerim u kojem bi pravcu trebalo ići u budućem periodu. Hvala na razumijevanju.“

Emira Karić, predsjednica kluba vijećnika SDP: „ Kolega Hasane, ne može se sjednica završiti za 15 minuta. Što se tiče peckanja, što je rekao kolega prethodni diskutant, ne bih ni ja naravno peckala, ali kada tražimo mak na konac dobit ćemo na konac. Govorite o pogreškama nekakvog konta itd. pa ja vas pitam ovdje stoji isplata stipendija, mogu i pokazati, konto je, čini mi se, 614233 i ovdje ne stoji ništa i ja vas pitam i načelnika i vijećnike je li nema isplate stipendija, pošto na ovom kontu nema ništa. Zatim ima Udruženje građana „Spreča“ navedeno, ali ne stoji ništa i da li to znači da se tom društvu ne daje nikakav iznos. Što se tiče uporednih pokazatelja oni su isto tako, kolega Mehmede, bili ako se sjećate, čak mislim i u prošlom mandatu u drugoj godini, bio je takav urnek budžeta i bili su uporedni pokazatelji. Međutim izgleda da smo se mi previše kačali na te pokazatelje, pa zašto ovo, pa zašto ono i onda je nekome dozlogrdilo i onda je došao ovako suhoparan materijal. Naša jedina mogućnost je da uzmemo izvršenje, pa da onda sami sebi ovako upoređujemo, a možemo mi te istraživačke metode koristiti na neke druge stvari, a ne na ovo od čega ne postizemo ništa. Takođe pitam kolege vijećnike koji će usvojiti ovaj budžet hoćete li vi reći građanima zašto je potpora 500.000, a dignut ćete sada ruku? Šta je to općina Doboj Istok planirala za 500.000, jer ovdje nije navedeno ni u narativnom dijelu, ni u tabelarnom dijelu. Zašto vi dižete ruku za 500.000 potpore viših nivoa vlasti? Ja ne znam. To se samo može vidjeti kada izađemo na teren, pa nešto se pravi, a to nije u redu. Znači ipak mi, kao što kaže kolega, planiramo i mi smo ti koji trebamo znati za krucijalne stvari koje se dešavaju na našoj općini, ali eto vi imate povjerenja u gospodina načelnika, ja nemam, jer mislim da je korektno da nam se objasne te stvari. Postavljam pitanje zašto 500.000 potpore i šta je to planirano? Pitam za plan, a ne za ostvarenje. Mnoge stvari se i ne mogu ostvariti, sve zavisi od danas do sutra, jer vidite zemljotrese i poplave, ne daj Bože. Ali eto šta je to planirano, pa bih možda i ja podržala takvu vrstu budžeta. Ovako zaista ovaj budžet nije za podržati.“

Hasan Hasančević, predsjednik kluba vijećnika SDA: „Prvo sve da vas poselamim. Nisam se mislio javljati, ali izgleda da opet ja postajem inspiracija nekim ljudima da li bolestan ili ne bolestan. Kada se neko obrati spreman sam i na repliku ili na bilo šta tako da ubuduće vodite računa. Uvaženi predsjedavajući, od danas, od sljedeće sjednice sahat preda se toliko se diskutuje, toliko je Hasanu, toliko je Mehi, toliko je Senadi, Husi i Hasi i onda će biti sjednica transparentna. Ono što su nam Statut i Poslovnik o radu omogućili da govorimo i govorit ćemo. Ponukala me diskusija kolege Mehe, uredno je sve, ali ja kao predsjednik Sindikata općine Doboj Istok bih volio da je malo više od 41%. Vi znate kolike su plaće u općini i koliko je to u odnosu na druga udruženja, druge organizacije, kanton i sve ostalo i sindikat vodi bitku da se ta plaća dovede u neku srazmjeru sa potrebom onih koji to ostvaruju. Moram naglasiti da je sindikat uspio sa načelnikom dogovoriti i osnovicu i topli obrok i sve ono što sleduje u smislu da niko ne bude ni posve zadovoljan, a ni posve oštećen. Tako da bi ubuduće morali voditi računa da je ovaj budžet u skladu sa zakonom napravljen, kao što je kolega rekao da ima sve svoje norme. Postoje potpisi, postoje uporedni pokazatelji, neke kolege su nove, ali onaj ko hoće da zna, on zna, jer ne

možemo mi učiti o budžetu, ni kako doći do određenih informacija. Ovaj budžet, a drago mi je što je kolega Mehinović primijetio, od 300.000 i nešto poslije rata do 2 – 3 miliona danas. Mi svi znamo ko, doslovno ću reći, jaše na takvom budžetu, ko doprinosi, ko je to donio više, ko manje, ko radi, ko ne radi, gdje se ulaže, gdje se ne ulaže. Ja bih se zahvalio načelniku na hrabrosti da se ovakav budžet predloži i da se usvoji u doba pandemije, a to niko i ne spominje. Nisu budžet samo uposlenici, ovaj budžet je i Čisto i voda i zimsko održavanje i škole i obdanište i sve moguće što postoji na Doboju Istoku.“

Kemal Skopljak, vijećnik BPS – Sefer Halilović: „ Prvo da izrazim svoje neslaganje i nezadovoljstvo sa odbijanjem svih naših amandmana čime je načelnik u startu odbio bilo kakvu saradnju sa opozicijom. To je za mene poruka. Nije vam trebalo, ali to je sada vaše. Mene jedino interesuje ovdje konto 613422 – medicinski i stomatološki materijal 20.000 KM. Da mi predlagač narativno objasni o čemu se ovdje radi. Zar ima tolika potreba za stomatološkim materijalom u Doboju Istoku u vrijeme, sada smo malo prije rekli, ove pandemije. Zar nema drugih službi kojima su ova sredstva neophodnija. Molim vas da mi objasnite o čemu se radi i o kakvom materijalu, jer svi znamo da Fond zdravstvenog osiguranja pokriva nabavke materijala u Domu zdravlja. Sada da li je dostatno, da li nije, to direktor raspoređuje i najbolje zna. Mene samo interesuje stomatološki materijal.“

Mehmed Mehinović, vijećnik SBiH: „ Kolega Hasane, zaista nemam nikakav problem da predsjedavajući svede u okviru, jer ja mogu prekinuti svoju diskusiju dokle sam stigao. Apsolutno se slažem, ali sam mislio da je važna materija, pa da se ne javljam dva puta i da repliciram itd. Apsolutno da me ne bi pogrešno shvatili nisam protiv plaća radnika rekao ni riječi. Htio sam da kažem, ali nisam bio dovoljno jasan da je nekada to učešće plaća i radnika u budžetu bilo daleko veće. Potpisali ste ugovor i smatram da je situacija dobra i da je u nekim standardima međunarodnog monetarnog fonda koliko treba da učestvuju troškovi radnika u ostvarenom budžetu. Kada sam se već javio, a mogu se i ne javljati nije nikakav problem, ali da kažem da zaista u ovo vrijeme hrabrost je staviti tamo 1.350.000 za kapitalne primitke, pa ko god to ostvari. Hajmo staviti podršku toj vratolomiji u ovo vrijeme, a može ona biti i veća, to nije problem, može ista, a može i manja. Ako se ostvari svima će nam biti dobro na općini Doboju Istok, a ako se ne ostvari nije čudo, jer je i to jedan pogolem zalogaj i čestitam na hrabrosti u tom pogledu, jer trebat će dosta truda da uloži menadžment da bi se taj prihod ostvario. Hvala lijepo.“

Emira Karić, predsjednica kluba vijećnika SDP: „ Takođe bih se složila u dijelu da nas prekinete, odnosno da se Statut i Poslovnik o radu poštuju i da nas prekidate ukoliko nam diskusija bude duža, ali molim vas predsjedavajući da se poštuje Kodeks ponašanja. Mislim da nije više korektno trpiti ovdje, hajmo reći, nekodeksne riječi tipa jaše itd. O prošlom mandatu neću ni da govorim kakve su bile ovdje izgovorene riječi, pa ako ćemo ići korektno onda i diskusija u određenom vremenu i Kodeks ponašanja ili bar opomena za to.“

Selmin Karić, predsjedavajući Općinskog vijeća: „Ja vodim sjednicu i dajem riječ i oduzimam ako treba naravno sve u skladu sa Statutom i Poslovnikom o radu. Ima li još neko vezano za ovu tačku?“

Kemal Bratić, općinski načelnik: „ I meni je žao što amandmani nisu usvojeni. Ja sam rekao argumente i stojim iza toga. Kada se radi o budžetu svi mi znamo šta je budžet. To je jedna promjenljiva materija koja se mijenja iz dana u dan ili iz mjeseca u mjesec. Samo pregleda radi prije par dana sam potpisao ugovor o prenosu sredstava sa kantonalnim ministarstvom u vrijednosti 266.000 za ulaganje u Lukavici Rijeci za kuće koje su poplavljene, 100.000 za ukoritavanje rijeke Spreče i to je bilo prekjuče i 70.000 KM za jesenju sjetvu. Znači 436.000 samo u ovoj sedmici je Općina Doboju Istok potpisala i donijela sredstva na našu općinu od kojih će najveću korist imati građani. Kada se radi o ovom što traži uvaženi vijećnik Skopljak medicinski materijal, tako se konto zove i naravno da neće općina Doboju Istok nabavljati, ali moramo imati na kontu radi ove situacije ukoliko budemo nabavljali opremu kao što smo morali nabavljati, pa smo uzimali od sredstava civilne zaštite i na štabu smo donosili odluku da kupujemo određena sredstva. Između ostalog i za izbore smo morali obezbijediti, ako niste znali, određena medicinska sredstva maske, sredstva za dezinfekciju, skafandere i ne znam šta više smo nabavljati, jer je to naša zakonska obaveza. Neko je od diskutantata primijetio da je određen pad u prilivu sredstava i to je ono što je najbitnije kako sredstva da uđu u budžet, a kada uđu onda svako zna to potrošiti. Prihodi od indirektnih poreza su u 2020. godini bili preko 1.200.000 KM, a ovdje imamo određen pad. Takođe ono što je u budžetu 2020. godine bilo je da smo negdje oko 700.000 imali prihode od poreza na dohodak. Ovo je projekcija federalnog ministarstva i mi je moramo poštovati i pridržavati se onako kako nam oni

dostave. Ja mislim da će ovi prihodi kako od indirektnih, tako i od poreza na dohodak biti veći nego što smo mi ovdje planirali, a naravno i ovi drugi prihodi, jer smo išli oprezno radi ove epidemije koja nas je nažalost snašla, kako nas tako i cijeli svijet. Ono što ja želim reći i što sam stalno govorio prethodnih mjeseci jeste da na području općine Dobož Istok ukupno 60 ljudi je izgubilo posao do sada, a vidjet ćemo sa 31.12. koliko će to biti. Tako da nije u odnosu na neka druga okruženja koja se isključivo bave turizmom, ugostiteljstvom, trgovinom gdje vjerovatno imaju značajan problem ili više problema kod poslova i samim tim i prihoda. Kada se radi o općinskim vijećnicima bile su na početku inicijative i svako od vas ima pravo da podnese bilo koju inicijativu i ona se prihvati ili ne prihvati. Ja vam odgovorno tvrdim da sve općine naše veličine imaju slične paušale. Da li su oni mali, ja ne znam, da li trebaju biti veći, takođe ne znam i nije moja nadležnost, jer vi ste vijećnici i vi imate pravo da smanjite, da ukinete ili da povećate. Isto tako naš je Statut rekao da predsjedavajući može biti profesionalac, ali ne mora i do sada to nije bila praksa da predsjedavajući bude profesionalac. Ja lično smatram da nema potrebe da bude profesionalac. Tako da što se toga tiče stojim na raspolaganju. Nije načelnik rekao da bude ovako, ovo je novi program. Ni meni nije lakše, ali ovo je novi program i to možete provjeriti u finansijama da je to tako. Nisam ja izmislio da nema uporednih pokazatelja, ali bitno je da nađemo neku mahanu. Kada se radi o rashodima primijetili ste da ni jedna stavka nije povećana, a čak su neke smanjenje. Znači ono što je najbitnije jeste da ćemo i u idućoj godini pokušati da ne napravimo neki minus, da budžet bude stabilan. Znamo tamo šta smo po zakonu i statutu dužni da ispunjavamo i da plaćamo. Sve drugo ukoliko vidimo da se stanje tamo u proljeće smiri mi možemo napraviti rebalans budžeta ako vidimo da neku stavku treba povećati, odnosno smanjiti. Ne bih ulazio i ne bih nasjedao na ove provokacije, da ne otvaramo nove replike smatram da ovu godinu trebamo završiti u jednom dobrom prijateljskom odnosu. Načelnik ima volju za saradnju i sa pozicijom i sa opozicijom. Ako neko misli da ne prihvatanjem ovih amandmana načelnik pokazuje da neće da saraduje sa nekim iz opozicije, varate se. Ja samo kao čovjek, a svako i od vas ima pravo da iznese svoje mišljenje i svoj stav. Ja kao pripadnik Armije BiH smatram da trebamo ići u tom pravcu da smanjujemo broj tih udruženja, a samim tim da smanjujemo i izdatke, pa da ta sredstva koja uštedimo damo za stipendije, damo za poljoprivredu. Puno je, a navest ću samo kantonalni budžet, da udruženja od posebnog značaja nose preko milion KM. Puno je to, htjeli mi to priznati ili ne. I ovdje naša udruženja nose određene iznose i kada bi to sve stavili na jednu hrpu, vjerujte mogli bi uraditi dosta značajnih projekata i mogli bi pomoći onima kojima je pomoć stvarno bitna. Jedno zapažanje koje mi se takođe svijdjelo ovdje, neko je od vas rekao, je igre na sreću. Ovaj iznos je plan i ako ste pratili nekada je znao biti 70.000, a jedne godine je bio i 100.000 KM. Pazite to su samo oporezovani dobici, nisu sitni koje određene stranke pokušavaju da i njih oporezuju. To je pokazatelj da iz tih kladionica sa općine Dobož Istok ide jedan općinski budžet. Da ne pominjem mjesne zajednice i pojedinačne kladionice i to je ono najveće zlo protiv kojeg se svi moramo zajedno boriti i uticati tamo gdje god možemo uticati. Bez obzira bilo replika ili ne neću se više javljati. Svima vama želim da ovu 2021. godinu provedete u zdravlju i rahatluk u sa svojim porodicama i ako Bog da da se vidimo na sljedećem Općinskom vijeću.“

Mehmed Mehinović, vijećnik SBiH: „Ispravka krivog navoda. Ni jednog trenutka u mojoj diskusiji nije provejavalo da nije ovakav softver, softver je ovakav, ali budžet se morao planirati na osnovu devetomjesečnog ostvarenja ili plana za prethodnu godinu ili procjene ostvarenja za prethodnu godinu. Morao se planirati i nikakav nije problem da služba pored ovog stavi i taj pokazatelj, jer nigdje ne piše da se to ne može staviti. Kada sam kod ovih paušala vijećničkih, jedne prilike sam na Kolegiju potegao pitanje i od gospodina načelnika sam dobio odgovor ja razmišljam da se smanji taj paušal. Nije problem neka se ukine taj paušal, ali smo dali doprinos za nešto. Ja imam prijedlog da naš sekretar uputi svim općinama upit koliki su paušali u vijeću. Mi smo srednje razvijena općina, jer tako u strategiji stoji i tako smo usvojili da smo srednje razvijeni i to podijeli sa 12 i koliko bude neka bude i naš paušal. Ako bude 100 KM neka bude 100 KM, ja pristajem i na to. Ove insinucije nisu tačne i hajde da utvrdimo tačno stanje i da ne bude istina ni što ja pričam ili što eventualno neko drugi priča. Ne može me niko drugi ubijediti da budžet ne može biti transparentniji, donijet ću vam koliko hoćete budžeta, moraju biti uporedni pokazatelji. Ovo jest softver koji knjiži budžet, ali uporedni pokazatelj na osnovu čega je planiran takav budžet mora postojati. Hvala lijepo.“

Emira Karić, predsjednica kluba vijećnika SDP: „Neću se ponavljati, kolega Mehmed je uzeo dio moje replike i ja ću samo reći nešto vezano za udruženja građana i nevladin sektor. Ovo što je načelnik rekao je zaista poražavajuće zato što zaista u isčitanim literaturama o nevladinom sektoru mogu samo reći vrlo kratko da su oni najjači korektori i pokretači društva. Što više nevladinog sektora, to je država bolja. Ko o tome ima iole neke informacije vjerovatno će podržati ovo, odnosno reći da je korektno. Što se tiče

paušala isto tako nije u redu ovo što načelnik govori, jer visina paušala isključivo zavisi od načelnika. Mi to znamo. Hoćete li da vas dovedem u neugodnu situaciju iduće Vijeće kada ću imati vijećničku inicijativu da se odrekne paušala, volonterski, konto stipendije i naravno vi to nećete prihvatiti. Ako ćete prihvatiti recite mi odmah da skupimo potpise i ja stavim na fejbuk da većina nije podržala volonterski rad. To nije korektno sa moje strane, ali isto kažem po meni je mizerno raditi za ovaj paušal zato što smo srednje razvijena općina. I ja sam to istraživala i imate paušal, a imate i 150 naknadu za sjednicu, a onda imate 50 KM za komisiju. Nije paušal u drugim općinama 300 KM, nego kada svedemo sve dođemo do lijepo cifre od 700 KM. Vi ćete to potrošiti, budite sigurni da ćete potrošiti, tih 250 KM i to će vam otići na telefone, kafe itd. Kuda ono kada te neko sretno, pa kaže ti si vijećnik, pa moraš 50 ili 100 KM dati, jer to je jednostavno tako. Mislim da nije korektan načelnik i nije to samo zbog nas 6, vas ima 11 tu u poziciji i smatram da je prvo vas trebao ispoštovati. Da li će vam na neke druge načine to regulisati, to nije stvar ovoga, nego kažem bitno je biti korektan, ali ne može biti bahatost korektnost. Ja razumijem bahatost kao što vi razumijete kada ja malo i podbadam, pa hajmo se naći na nekoj sredini ili ćemo i dalje kao što kažu tjerati se, pa vidjeti na šta to izlazi.“

Selmin Karić, predsjedavajući Općinskog vijeća: „Zahvaljujem. Kada su u pitanju paušali, načelnik nema sa paušalima ništa mi smo ti koji donosimo odluku, znači do nas je i da rasčistimo sa tim. Budžet iznosi 3.670.815 i po mom mišljenju je realno planiran uzimajući u obzir izvršenje budžeta za januar – septembar 2020. godine, projekciju poreskih prihoda i potpora sa viših nivoa vlasti, kao i plan implementacije projekata sa izvorima finansiranja za 2021. godinu. Znači nacrt budžeta je prošao kroz javnu raspravu i ja sam mišljenja da su ispunjeni svi uslovi da se budžet usvoji. Kada su u pitanju kapitalne investicije, mi imamo Strategiju razvoja općine Doboj Istok za period 2021-2027. godina i otprilike svi projekti se crpe iz te strategije. Mislim da je to dovoljno rečeno. S obzirom da se više niko ne javlja zaključujem raspravu i prijedlog Budžeta za 2021. godinu dajem na glasanje. Ko je za usvajanje Budžeta općine Doboj Istok za 2021. godinu?“

Glasanje: ZA – 10, PROTIV – 6, SUZDRŽANIH – 0.

Konstatujem da je Budžet općine Doboj Istok za 2021. godinu usvojen sa 10 glasova za i 6 protiv“.

Ad.2. Razmatranje i usvajanje prijedloga Odluke o izvršenju Budžeta općine Doboj Istok za 2021. godinu.

Selmin Karić, predsjedavajući Općinskog vijeća: „ Otvaram raspravu po ovoj tački dnevnog reda. Ne vidim prijavljenih i zaključujem raspravu. Ko je za usvajanje prijedloga Odluke o izvršenju Budžeta općine Doboj Istok za 2021. godinu ?“

Glasanje: ZA – 15, PROTIV – 1, SUZDRŽANIH – 0.

Konstatujem da je Odluka o izvršenju Budžeta općine Doboj Istok za 2021. godinu usvojena sa 15 glasova za i 1 protiv. Ja vam se zahvaljujem, zaključujem današnju sjednicu i želim vam sretnu novu 2021. godinu i sve najbolje vama i vašim porodicama i da nam bude bolja nego ova 2020. godina.“

Sjednica je završena u 11, 10 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVAJUĆI
OPĆINSKOG VIJEĆA
Selmin Karić

Službena zabilješka:

Zapisnik je usvojen na 3. redovnoj sjednici Općinskog vijeća Doboj Istok održanoj dana 28.01.2021. godine.

U Klokotnici, dana 29.01.2021. godine

Zabilješku sačinio
Omer Hadžić, sekretar Općine